

是修行則爲已得報佛之恩永離衆苦說是經已菩薩摩訶薩即得阿耨多羅三藐三菩提聲聞緣覺即得六通三明具八解脫有得法眼淨者若有衆生得聞是經不墮三塗八難之處地獄休息苦痛安寧信相菩薩白佛言當何名此經云何奉持佛告信相菩薩善男子此經名爲罪業報應教化地獄經當奉持之廣令流布功德無量諸天大衆聞經歡喜五體投地作禮奉行

佛說罪業報應教化地獄經

佛說龍王兄弟經

吳月支國優婆塞支謙譯

聞如是一時佛在舍衛國祇洹阿難邠坻阿藍時有無央數比丘僧皆阿羅漢也阿難邠坻至佛所作禮却坐佛言人當布施持戒忍辱精進禪定智慧阿難邠坻聞之歡喜即起白佛明旦請佛及比丘僧降德到舍設麤食佛默然阿難邠坻遶佛三匝而去佛告比丘僧旦日當上天投日中下會阿難邠坻舍佛如伸臂頃即住虛空中羅漢名須檀正衣服

於虛空中長跪白佛我恒上下未嘗冥如今
日也佛言有兩龍王瞋恚作變吐氣為雲故
也復有羅漢名愛波白佛欲行止之佛言此
龍大有威神汝行者必當與惡意出水沒殺
天下人民大目犍連復正衣服長跪虛空中
問佛今日以冥不復見須彌山帝釋宮殿下
已質樹子佛言有兩龍王一名難頭二名和
難大瞋恚言何等沙門欲飛過磨我頭上龍
身繞須彌山七匝以頭覆其上吐氣出霧故
冥目連白佛往訶止之佛言大善目連繞佛

教九

二十

三匝而行釋提桓因從八萬八千玉女於後
園相娛樂目連先過其所天帝迎之稽首作
禮相問訊已乃到龍所兩龍見之大怒便變
化出煙須臾復出火目連以佛意亦變化煙
火繞兩龍三重稍前分身入兩龍身中右目
入左目出左目入右目出右耳入左耳出左
耳入右耳出復入右鼻左鼻出入左鼻右鼻
出飛入其口中兩龍謂目連在腹中也目連
亦復作龍身繞兩龍十四重以頭覆須彌及
兩龍兩龍於下悚慄延動須彌山以尾搏扇

海水百獸震怖佛遙告目連此龍今當能出水沒壞天下汝且慎之目連言我從佛聞知此法我有四神足當信持行之我能取是兩龍及須彌山著掌中跳越他方天下亦能磨須彌山令碎如塵復能磨及須彌山及下地令萬民不覺之兩龍恐懼稽首目連復沙門身兩龍化作人爲目連作禮悔過目連將至佛所兩龍言我迷狂惑不知尊神觸犯雷震哀原其罪便受五戒而去阿難郗坻到精舍索佛及比丘僧了不見一人便長跪白佛飯

具已嚴辦佛可自屈佛即下到其舍飯已阿難郗坻言我求佛不見佛從何所來佛言目連與兩龍王共諍適從天上來下問誰勝者佛言目連阿難郗坻言善哉善哉此龍持戒堅強矢之豪數罪至於龍威神尊重目連廻臣伏之乎我從今日始請佛及比丘僧宣揚目連功德佛呪願迦羅越阿難郗坻汝前後飯食得道人善鬼神當擁護汝家皆令安隱阿難郗坻作禮而去佛說龍王兄弟經